

## ԱԶԳԱՅԻՆ, ՄՃԱԿՈՒԹԱՅԻՆ, ՀԱՍԱՐԱԿԱԿԱՆ ՃԱԲԱԹԱԹԵՐԹ

**Քէպէֆի Եւ Գանատայի  
Ներգաղթի Նախարարներ՝  
Կոտէնի Եւ Ա. Բաւուրդիի  
Մասնաւոր Կարգադրութեամբ  
Եւ Հրամանով Թրփահայ  
Գաղթականներու Մեծ Խումբ  
Մը Կը Ժամանէ Մոնթրէալ**

**ԿՈՉ՝ ՄՈՆԹՐԷԱԼԱՀԱՅՈՒԹԵԱՆ**

Երկար ատենէ ի վեր կի-  
մանանք, թէ թրքահայ ըն-  
տանիքներ փախչելով Թուր-  
քիոյ կառավարութեան փոք-  
րամասնութեանց հանդէպ  
ցուցաբերած սեղմումնե-  
րէն՝ դացած են ապաստան  
խնդրել Հոլանտայի կառա-  
վարութենէն:

Հ. Բ. Ը. Միութեան Կեդրո-  
նական Վարչութեան մի-  
ջամտութեամբ եւ Տիրար Ալեք  
Մանուկեանի անձնական  
նուիրատուութեամբ «Հայ  
Տան» մը կառուցմամբ կա-  
րելի եղած է այս ընտանիք-  
ներէն խումբի մը ապաստան  
չնորհել Հոլանտայի մէջ:  
Սակայն, կային տակաւին  
ուրիշներ, որոնք կը մնային

երկրէն բռնի արտաքսման  
սպառնալիքին տակ:

Այս անգամ եւս, ՀԲԸՄ-ի  
Կեդրոնական Վարչութեան  
օգնութեան դիմուած ըլլա-  
լով, բազմաթիւ լուծում-  
ներ որոնելէ ետք, այս կա-  
պակցութեամբ աշխատանքի  
ձեռնարկուեցաւ Գանատայի  
կառավարութեան հետ, 1979  
թուականէն սկսեալ: ՀԲԸՄ-ի  
Կեդրոնական Վարչութիւնը  
Մոնթրէալի մէջ նշանակած  
էր տեղական Մասնաճիւղի  
Ընկերային Օգնութեան  
Յանձնախումբի յատենի  
ատենապետ, այժմ հանգուց-  
եալ, Պրն. Քերովէ Պտուկ-  
եանը՝ այս աշխատանքին

(Շար. էջ 4)

**Ս. Գր. Լուսաւորիչ Շարաթօրեայ Վարժարանի  
25-ամեակը Նշուեցաւ Արժանի  
Խանդավառութեամբ Առաջնորդ Սրբազան Հօր  
Նախագահութեամբ**



Շարաթ, Մարտ 27-ին,  
Մոնթրէալի Ալեք Մանուկեան  
Վարժարանի Ա. եւ Ն. Կէօն-  
ճեան Սրահին մէջ շքեղորէն  
սոնախմբուեցաւ Ս. Գրիգոր  
Լուսաւորիչ Եկեղեցւոյ Շա-  
րաթօրեայ հայ վարժարանի  
25-ամեայ արծաթեայ տա-  
րեդարձը, հոծ թիւով զըպ-  
րոցասէրներու ներկայու-  
թեամբ եւ յատկապէս այս  
հանդիսութիւնը նախա-  
գահելու համար քաղաքս ժա-  
մանած Առաջնորդ՝ Գերշ.  
Տ. Թորգոմ Արք. Մանուկ-  
եանի հովանաւորու-  
թեամբ: Վարժարանի շըր-  
ջանաւարտներուն կողմէ  
սպասարկուած համեղ ճաշե-  
րէն ետք, Պրն. Վահէ Քէթ-  
լիի ձեռնհաս սեղանապետու-  
թեամբ գործադրուեցաւ

Հանդիսութեան պատուոյ սեղանը, ձախէն աջ:  
Վարժարանի տնօրէն՝ Պրն. Օճնիկ Գալուստեան եւ  
Տիկ. Էմմա Գալուստեան, Վարժարանի Խնամակալու-  
թեան ատենապետուհի՝ Տիկ. Էլտա Ա. Բիպրիթեան,  
Առաջնորդարանի Կրթական Բաժնի վարիչ՝ Օր. Սիլվա  
Տէր Ստեփանեան, Միակն Խորհուրդոյ ատենապետ՝  
Պրն. Արթո Պասմանեան, Թեմիս Բարեխնամ Առաջնորդ՝  
Գերշ. Տ. Թորգոմ Արք. Մանուկեան, Եկեղեցւոյ հովիւ  
Տ. Բարթոլ Ա. Քիւնյ. Խրքանեան, Երեցկիւն՝ Զապէլ  
Խրքանեան, Տոբ. եւ Տիկ. Արշալիր եւ Նատիա  
Կեօնեան եւ հանդիսավար եւ Յորիւանի Յանձնա-  
խումբի ատենապետ՝ Պրն. Վահէ Քէթլի

գեղեցիկ ելոյթներու շարք  
մը եւ գեղարուեստական յու-  
զիչ յայտագիր մը, ամբող-  
ջութեամբ պատրաստուած  
աշակերտներու եւ շրջա-  
նաւարտներու կողմէ:  
Յաջորդ օր, Կիրակի, Սըր-  
բազան Հայրը պատարագեց  
եւ քարոզեց, հոգեւոր մխի-

թարութիւն պարգեւելով  
ներկայ բազմահարիւր հաւա-  
տացեալներուն:  
Յաջորդիւ պիտի անդա-  
դառնանք այս տպաւորիչ  
հանդիսութեան մանրամաս-  
նութեանց:

### Ֆրանսահայ Հասարակական Գործիչ Աղասի Դարբինեան

**ՊԱՐԳԵՒԱՏՐՈՒԱԾ «ԺՈՂՈՎՈՒՐԴՆԵՐԻ  
ԲԱՐԵԿԱՄՈՒԹԵԱՆ ՇՔԱՆ ՇԱՆ» ՈՎ**

Գոհունակութեամբ տեղե-  
կացանք, թէ Ֆրանսահայ  
ժանօթ ազգային դէմքերէն՝  
Պրն. Աղասի Դարբինեան  
Մարտ 1, 1982-ին, ստո-  
րագրուած հրամանագրով  
մը պարգեւատրուած է Սով-  
ետական Միութեան ժողով-  
ուրդների Բարեկամութեան  
չքանչանով: Հրամանագիրը  
ստորագրուած է Լ. Պրէժ-  
նեկի եւ Լ. Գէորգեանի կող-  
մէ:  
Աղասի Դարբինեան ար-  
ժանաւոր զաւակն է դարա-  
ընկիրդի հայ ժանօթ դեկա-  
վար՝ Արտակ Դարբինեանի:

Աղասի Դարբինեան հիմնա-  
դիրներէն մին եղած է Ֆրան-  
սահայ Մշակութային  
Միութեան եւ երկար տարի-  
ներ կազմակերպած է գրող-  
ներու, գիտնականներու եւ  
արուեստագէտներու փոխա-  
դարձ այցելութիւններ Հա-  
յաստանի հետ, Ֆրանսացի  
ժողովուրդին ծանօթացնելով  
հայ մշակոյթը եւ Խորհ. Հա-  
յաստանի պայծառ իրա-  
կանութիւնը: Նոյնպէս,  
ան անձնական ճիգերով  
կազմակերպած է բազմաթիւ  
մշակութային արժէքներու  
հայրենադարձութիւնը:

### Տորֆ Անգեղը Երեւանի Մէջ



Երեւանի Սովետական  
չրջանի 4-րդ եւ 2-րդ մասե-  
րը իրարմէ անջատող ձորին  
մէջ, սեպածեւ բարձունքի  
վրայ վեր խոյացած է հայ-  
կական առասպելի հերոս-  
ներէն մէկու՝ Տորք Անգեղի  
պղնձակոփ արձանը: Տորքը  
ներկայացուած է թշնամի  
նաւերը հալածելու պահին.  
ահա ան զօրեղ բազուկներով  
ժայռի հսկայ բեկոր պոկած  
է, բարձրացուցակ է գլխէն.  
վեր եւ կը պատրաստուի

զայն նետելու թշնամի նա-  
ւերուն վրայ: Քանդակագործ  
Կառլէն Նուրիջանեան ձգ-  
տած է հաղորդել առասպե-  
լական հերոսին խիզախու-  
թիւնը, ահարկու ուժը, հայ-  
րենասէրին մեծ կամքն ու  
վճռականութիւնը:  
Պատուանդանին հետ՝  
արձանին բարձրութիւնը  
կ'անցնի 8 մետրը եւ ձուլ-  
ւած է 2.5 թոն պղինձէ:

# Թորոնթոյի Ս. Խաչ Համայնքի Լուծման Մանրամասնութիւնները

Մեր անցեալ շաբաթուան թիւով տուած էինք Թորոնթոյի Ս. Խաչ Եկեղեցւոյ ծուխին լուծման լուրը: Այս թիւով մեր ընթերցողներուն կը ներկայացնենք նոյն հարցին կապակցութեամբ Ամերիկահայոց Արեւելեան Թեմի Առաջնորդութեան այն շրջաքերականը, ուր մանրամասնութեամբ կը պարզուի հարցին էութիւնը: Նկատի ունենալով այս նիւթին լրջութիւնը, շրջաքերականը կը հրատարակենք ամբողջութեամբ, առանց մեր կողմէ որեւէ յաւելումի կամ յապաւումի:

ԽՄԲ.

Վիճակիս Հոգեւոր Հովիւներուն, Միակն Խորհուրդներու Ատենապետներուն եւ Թեմական Պատգամաւորներուն

«Թորոնթոյի Մեր Հաւատացեալներուն» ուղղուած տեղեկատուութիւնը կը բացատրէ պատճառները Առաջնորդին եւ Թեմական Խորհուրդին կողմէ առնուած որոշումին՝ ըստ որում Թորոնթոյի Ս. Խաչ Եկեղեցւոյ Միակն Խորհուրդն ու համայնքը լուծուած յայտարարուեցան: Հոն կը բացատրուի նաեւ աներաժեշտութիւնը Թորոնթոյի մէջ երկրորդ համայնք մը վերակազմելու համար առնուելիք քայլերուն:

«Թորոնթոյի մեր հաւատացեալներուն,

Խորունկ մտահոգութեամբ է, որ ձեզի կ'ուղղենք մեր խօսքը, նկատի առնելով հարցին կարեւորութիւնը մեր հաւատացեալ ժողովուրդին եւ թեմին համար:

1979 տարուան կիսուն, Գանատայի Թորոնթո քաղաքի նորակազմ Ս. Խաչ Եկեղեցին որպէս համայնք ընդունելէ առաջ, մենք եւ Թեմական Խորհուրդը Ս. Խաչ Եկեղեցւոյ Միակն Խորհուրդի անդամներուն յստակ կերպով բացատրեցինք, որ Հիւսիսային Ամերիկայի Հայց. Եկեղեցւոյ Առաջնորդարանի կանոնադրութեան բոլոր տրամադրութիւնները պէտք է յարգուին համայնքի վարչականներուն կողմէ: Միակն Խորհուրդը ստորագրութեամբ հաւանեցաւ յիշեալ կանոնադրութեան հաւատարմօրէն ենթարկուիլ, եւ մենք ու Թեմական Խորհուրդը ընդունեցանք, որ Ս. Խաչ Եկեղեցւոյ համայնքը մաս կազմէ Առաջնորդարանի իշխանութեան ներքեւ գործող եկեղեցիներուն, եւ հաստատեցինք Միակն Խորհուրդի անդամներու նշանակումը:

Ըստ Առաջնորդարանի որդեգրած սկզբունքներուն, 1980 թուականին համար Թեմական տուրք սահմանեցինք Ս. Խաչ Եկեղեցւոյ համայնքին՝ համաձայն Թեմական Պատգամաւորական Ժողովին կողմէ ընդունուած բանաձեւին, եւ Ս. Խաչ Եկեղեցւոյ համայնքին կողմէ Առաջնորդարանին ներկայացուցած տեղեկագիրներու հիման վրայ:

1980 թուականին, Թորոնթոյի Ս. Խաչ Եկեղեցւոյ Միակն Խորհուրդը, առանց Առաջնորդին եւ Թեմական Խորհուրդի գիտութեան, գրաւոր կերպով տեղեկութիւն ուղարկեց Հոգեւոր Հոգեւոր Բաժանմունքին՝ Առաջնորդարանին վճարուելիք տուրքերու օրինակութեան մասին, աւելցնելով նաեւ, որ այսպիսի նրբաշնորհ փոխանցում մը, մէկ երկրէն միւսը, գանատական բարեփոխական հաստատութիւններուն համար կրնայ հակաօրինական արարք նկատուիլ «Գէնէտիւրն Ինքամ Թաքս Աքթ»-ի կողմէ: Այդ նամակը գրողներու գիտումը պարկեշտ չենք գտներ: Անոնք Գանատայի բոլոր Հայ Եկեղեցիներու տուրքէ զերծ ըլլալու գոյափոխակեր կասկածելի ներկայացուցած են, Գանատայի Տուրքերու Բաժանմունքին ուղղուած իրենց նամակին մէջ մասնաւորաբար ակնարկելով անոնց մասին եւս, եւ ըսելով. «Իրականութեան մէջ, մենք չենք կարծեր որ գանատական որեւէ բարեսիրական հաստատութիւն որեւէ օգուտ կը ստանայ Նիւ Եորք զրկուած տուրք-

տուարներու հաշույն»: Եւ այս՝ ամբողջովին անճիշդ հաւաստում մըն է:

Մենք անձնապէս, եւ Թեմական Խորհուրդին հետ, փորձեցինք բացատրել Ս. Խաչ Եկեղեցւոյ համայնքի վարչականներուն որ իրենց այս արարքը իմաստուն քայլ մը չէ, եւ խնդրեցինք որ ետ կենան այս հարցը աւելի հետապնդելէ:

Առաջնորդարանի օրինական հարցերու խորհրդատուն գրեց Գանատայի Տուրքերու Գրասենեակը՝ բացատրելով մեր Թեմական կառոյցը եւ Առաջնորդարանի դիրքը նկատմամբ իր համայնքներուն, եւ տուաւ յաւելեալ տեղեկութիւններ՝ Առաջնորդարանի կողմէ իր համայնքներուն տրամադրուած եւ մատուցուած ծառայութիւններուն մասին: Գանատայի Տուրքերու Բաժանմունքը իր պատասխանին մէջ տեղեկացուցած է. «Եթէ Առաջնորդարանի վճարուած տուրքերը մատուցուած ծառայութեանց փոխարէն են՝ Տուրքերու Օրէնքներուն կողմէ ընդունելի են: Թորոնթոյի Ս. Խաչ Եկեղեցին է որ պէտք է յայտարարէ այս իրողութիւնը»:

Երբ Ս. Խաչ Եկեղեցւոյ համայնքի վարչականները անդրդուելի մնացին իրենց տեսակէտին վրայ, մենք եւ Թեմական Խորհուրդը հարցը իր բոլոր մասնաւորութիւններով ներկայացուցինք Թեմական Պատգամաւորական Ժողովին՝ գումարուած 1981 Մայիսին, եւ Պատգամաւորական Ժողովին թելադրութիւններ խնդրեցինք: Թեմական Պատգամաւորական Ժողովը զանցառու նկատեց Ս. Խաչ Եկեղեցւոյ համայնքը, որ չվճարելով իրեն սահմանուած տուրքերը՝ նովին իսկ գործով ոտնահարած է Թեմական կանոնադրութիւնը: Առաւել, Թեմական Պատգամաւորական Ժողովը զանցառու ընթացքին մէջ գտաւ Ս. Խաչ Եկեղեցւոյ համայնքը՝ որ ոտնահարած է Թեմական կանոնադրութեան օգին: Թեմական Պատգամաւորական Ժողովը պարտականութիւն յանձնեց ձեզի եւ Թեմական Խորհուրդին՝ աւելի մանրամասնութեամբ քննելու հարցը եւ առնելու անհրաժեշտ նկատուած որոշումները:

Նամակներու եւ հեռաձայնային խօսակցութեանց միջոցաւ կրկին փորձեցինք տարհամոզել Ս. Խաչ Եկեղեցւոյ Միակն Խորհուրդը՝ հարցերու մօտեցման իրենց ընթացքը փոխելու համար: Չանազան առիթներով, մենք եւ Թեմական Խորհուրդի ներկայացուցիչները Թորոնթո եկանք՝ հանդիպում ունենալու համար Ս. Խաչ Եկեղեցւոյ համայնքի վարչականներուն հետ, ջանալով լուծում մը գտնել յարուցուած հարցին առնչութեամբ: Սակայն, այս բոլոր փորձերը ձախողեցան:

Ս. Խաչ Եկեղեցւոյ համայնքի վարչականները չեն վճարած իրենց Թեմական տուրքերը՝ Առաջնորդարանի իշխանութեան ներքեւ գործող համայնքներուն մաս կազմելէն ի վեր (1979), բացի մէկ առիթէ մը՝ երբ Ս. Խաչ Եկեղեցւոյ համայնքի անունով Առաջնորդարանի զրկուած է հազար տուար Միակն Խորհուրդի վարձած փաստաբանին կողմէ «որպէս բարեկամեցողութեան արտայայտութիւն», համայնքին ունեցած պարտաւորութեանց հաշույն: Ս. Խաչ Եկեղեցւոյ համայնքի վարչականներուն այս ընթացքը բոլորովին անընդունելի եւ Հայց. Եկեղեցւոյ աւանդութեանց հակառակ գտանք: Մեր Առաջնորդարանի Պատմութեան մէջ աննախընթաց երեւոյթ մըն էր այս: Եւ փաստաբանին վերադարձուցինք 1,000 տուարի փոխգիրք՝ ըսելով որ Առաջնորդարանը սովորութիւն չունի իր համայնքներուն հետ ունեցած իր հաղորդակցութիւնը վճարուած միջնորդներու միջոցաւ կատարելու:

Ս. Խաչ Եկեղեցւոյ համայնքի վարչականներուն եւ ծխականներուն հետ՝ յարուցուած հարցին տրամաբանական լուծում մը գտնելու մտադրութեամբ, վերջին փորձ մը եւս կատարեցինք, եւ մենք ու Թեմական

## ՆՇՄԱՐՆԵՐ

### Մեծութեան Մեծութիւնը

Անցեալի մեծ իրագործումներով ծանօթ անձնաւորութիւններու մասին երբ կը խորհինք կամ կը խօսինք, ըլլան անոնք նկարիչներ, երաժիշտներ, գրագէտներ կամ այլ մարդերու մէջ կարկառուն դէմքեր, ընդհանրապէս կը պատկերացնենք զանոնք իրենց փայլուն յաջողութիւններով փառաւորուած անձեր, որոնք յարգանքի եւ պաշտամունքի արժանացած ըլլալու բախտը պէտք է ունեցած ըլլան իրենց ժամանակակիցներէն: Բայց փոքր պրպտում մը իրենց կենսագրութեան մէջ, կը յայտնաբերէ այնպիսի՝ պարագաներ որ անհաւատալի կը դարձնէ, թէ ի՞նչ չարչարանքներով ու հոգեկան տուայտանքներով անոնք երկնած են իրենց յղացումներն ու իրագործումները: Ի՞նչ անհաւատալի հալածանքներու ենթարկուած են անոնք ժամանակակից քրննադատներու, նախանձորդներու եւ միջակութիւններու կողմէ, որոնք նոյնիսկ եթէ այդ օրերուն մեծանուն անձնաւորութիւններու համբաւը շահած են, ընդմիջ մոռացութեան մատնուած են այսօր, մինչդեռ հալածուողը արդէն անմահներու դասը անցած է:

Այս խորհրդածութիւններուն մղուեցանք, երբ անցեալ քանի մը ամիսներու ընթացքին, ձայնասփոռմաներու յայտագիրներէ. ունկընդրեցինք երկու աշխարհածանօթ երաժիշտներու, Պեթհովէնի եւ Ռախմանինֆի մասին: Խօսնակը չ'անդրադարձաւ անոնց ստեղծագործութիւններուն, որոնք միլիոնաւոր ժողովուրդներու հոգիները կ'ազնւեացնեն եւ պիտի շարունակեն այդ դերը ով գիտէ դեռ քանի՞ դար, այլ ընդգծեց անոնց մեծութիւնը անոնց կրած յուսախաբութիւններու, յուսալքումներու եւ ձախողութիւններու ընդմէջէն:

Պեթհովէնի գրած առաջին, եւ միակ օփերէթը ներկայացուելու իսկ արժանի չգտնուեցաւ եւ անյողող հեղինակին ի վերջոյ պարտադրուեցաւ որ փոփոխութիւններ ներմուծէ, զայն վերածելու համար միջակու-

Խորհուրդը հրահանգեցինք Միսական Խորհուրդին, որ Կիբակի, Փետրուար 21, 1982-ին համար Միսական Անդամական Բացառիկ Ժողովի մը հրահրէ Ս. Խաչ Եկեղեցւոյ համայնքը: Դժբախտաբար, Ս. Խաչ Եկեղեցւոյ համայնքի վարչականները համագործակցութեան ոգի ցոյց չտուին եւ համայնքի հասցէները չտրամադրեցին եւ Հոգեւոր Հովիւը չկրցաւ Թորոնթոյի Ս. Խաչ Եկեղեցւոյ համայնքի քուէարկելու իրաւունք ունեցող բոլոր անդամներուն հրահր ուղղել: Այդ պատճառաւ, քիչ թիւով հաւատացեալներ ստացան մեր հրահրը, ժողովի օրակարգը եւ ներփակեալ բացատրական տեղեկագիրը՝ համայնքին մէջ ստեղծուած կացութեան մասին: Այս Միսական Անդամական Ժողովի օրակարգին մէջ մասնաւորաբար կար հետեւեալ առաջարկը. «Թեմական Խորհուրդը կ'ակնկալէ եւ կ'առաջարկէ որ Միսական Անդամական Ժողովը հրահանգէ Միսական Խորհուրդին՝ 1) հաւատարմօրէն ենթարկուիլ Թեմական Կանոնադրութեան, 2) գործադրել Առաջնորդին եւ Թեմական Խորհուրդի հրահանգները, 3) լրիւ վճարել Թեմական Պատգամաւորական Ժողովին կողմէ որոշուած ծխական տուրքերը»: Թեմական Խորհուրդէն երեք անդամներ իբրեւ լիազօր ներկայացուցիչներ նշանակուեցան մեր եւ Թեմական Խորհուրդին կողմէ, վերեւ յիշուած Միսական Անդամական Բացառիկ Ժողովին որպէս Նախագահ, Ատենապետ եւ Ատենադպիր:

Ս. Խաչ Եկեղեցւոյ համայնքի այս Բացառիկ Ժողովը Առաջնորդարանի ներկայացուցիչներուն համար եղաւ այնպիսի փորձառութիւն մը, զոր կը նախընտրեն մոռնալ: Ս. Խաչ Եկեղեցւոյ համայնքի վարչականները նախ պնդեցին իրաւազրկել Առաջնորդարանի ներկայացուցիչները՝ ղեկավարելէ իրենց գործերը, այն անհիմն առարկութեամբ, որ Առաջնորդն ու Թեմական Խորհուրդը որեւէ իշխանութիւն չունին Միսական Անդամական Բացառիկ Ժողով մը գումարել տալու եւ վարելու:

Ի վերջոյ, Ժողովի ընթացքին, երբ Առաջնորդարանի ներկայացուցիչներուն պատեհութիւն տրուեցաւ իրենց պաշտօնները ի գործ դնելու, Ս. Խաչ Եկեղեցւոյ համայնքի վարչականները եւ Միսական Խորհուրդի կարգ մը անդամները իրենց անարգական եւ խռովարար ընթացքով ստիպեցին Առաջնորդի եւ Թեմական Խորհուրդի ներկայացուցիչները հեռանալու ժողովասրահէն: Առիթը չտրուեցաւ որ օրակարգի մասնաւոր առաջարկը խորհրդածութեան նիւթ իսկ ըլլայ եւ քուէարկուի Անդամական Ժողովին կողմէ:

Ստեղծուած այս կացութեան մէջ, Առաջնորդարանի ներկայացուցիչներուն կը մնար ցաւով յայտարարել յատենի ժողովոյ, որ 1982 Փետրուար 21-էն սկսեալ, Թորոնթոյի Ս. Խաչ Եկեղեցւոյ համայնքը լուծուած է՝ համաձայն Առաջնորդի եւ Թեմական Խորհուրդի կողմէ իրենց տրուած հրահանգին:

Որոշած ենք նաեւ հետեւեալ անհատները զրկել մեր թեմին մէջ քուէարկող անդամի եւ վարչական պաշտօններու համար ընտրուելու եւ նշանակուելու առանձնաշնորհումէն, մինչեւ 1987 Փետրուար Արմէն Քիւրքճեան, Տոքթ. Ա. Վարդան Այնաճեան, Ղեւոնդ Շահմելիքեան եւ Ժիրայր Հանըմեան:

Մեր հրահանգն է նաեւ, սիրելի հաւատացեալներ, որ դուք չմասնակցիք եկեղեցական որեւէ արարողութեան՝ հովանաւորուած կամ կազմակերպուած Թորոնթոյի լուծուած Ս. Խաչ Եկեղեցւոյ անունով:

Մենք գիտենք որ դուք հաւատարիմ անդամներն էք Հայց. Եկեղեցւոյ եւ Հիւսիսային Ամերիկայի Առաջնորդարանին: Սիրելի հաւատացեալներ, ձեզի հանդէպ մեր ունեցած հոգածութեան իբր հետեւանք, մենք որոշած ենք Թորոնթոյի մէջ վերակազմակերպել մեր համայնքը: Եւ նշանակած ենք Արթ. Տ. Յուսիկ Քհնյ. Նշանեանը հոգատարելու համար մեր ժողովրդի հոգեւոր կարիքները, իսկ Գրիգոր Սրկ. Զմրութեանը նշանակած ենք ծովսին Հոգեւոր Սատակարար, մեր կողմէ նշանակուած Միսական Խորհուրդի մը հետ ընթացք տալու մեր համայնքի գործերուն:

Մենք կը յուսանք որ դուք, որպէս Հայց. Եկեղեցւոյ

հաւատաւոր անդամներ, պիտի համախմբուիք նշանակուած Միսական Խորհուրդին շուրջ, եւ պիտի կառուցանէք նոր ու խաղաղ հոգեւոր տուն մը ձեզի ու ձեր զաւակներուն համար:

Թող Տէրը օրհնէ ձեզ ու ձեր ընտանիքները, եւ ձեզ հաստատ պահէ մեր նախահայրերու հաւատքին մէջ:

Սիրոյ ողջունիւ  
ԹՈՐՈՒՄ ԱՐՔԵՊԻՍԿՈՊՈՍ  
Առաջնորդ